

Śląsko godka w Radiu Piekary

Szanowni Pleno Titulo Zebrani!

Powiyim dwa słowa, jak to my, we Radiu Piekary godka śląsko flyjgujemy.

My na radiowy fali ze sprawami tyj Ziymi byli piyrwsi ... na Śląsku,

My na radiowy fali świadectwo prowdy dali piyrwsi ... ło Śląsku,

My na radiowy fali piyrwsi gośno i z cuciym godali ... po śląsku.

Cyniymy to tak juz łod prawie dwunostu lot i dwanoście lot pomiyszkanie nowe momy we sercach Ślązoków, Hanysami ciepło nazywanymi, ale i te Władki, co naszo ziymia swojom do śmierci uznać chcom – przajom nom.

Nasze piekarskie radio mocno siedzi wurclami w sercach suchaczy. I w dziyń koždydni i w świątelnym som wszaltruwane we tysięcznych domach radioki, jakoby stałym łączym serdecznym. Jest te radio krzinkom życzyń szczegolnych a serdecznych płynących potokym prostych słow do prostych ludzi zatonkanych w wirze roboty tak twardej, jak wola trwania na tyj ziymi, w casie downym, dzisiejszym i prziszłym. Śląsko muzyka ze śląskymi słowami płynie na fali 88 i 7 we różnistych tonacjach nastrojow, łod zadumanego smutku przez spominki downych lot, przez sprawy dnia koźdego do biesiadnych rytmw.

Tworzy Radio Piekary ze suchaczami wielgo familijo choć niy spojono węzłami krwie, ale węzłami serc klupiących we jednym rytmie śląski i polski tożsamości. Mocnym spoiwym łączącym suchaczy jest gwara śląsko, mowa śląsko, a może juz język śląski.

Niy wiym, jak to dali sie bydzie zwało, ale jeji roli niy do sie przecynić. Mo ta naszo godka melodio sercym pisano i jest przezwiekowym łącznikym pokolyń. Jest mocnym dowodym obecności Ślązoków we obszarze kultury ty Ziymi Śląski. Jakby sie miała stracić, to grozi to zanikym norodu – wtorego obecne władze niy chcom uznać oficjalnie, ale tyn norod istnieje. Pamiyntocie, szanowni państwo, take hasło sprzed parunostu lot: Byliśmy, jesteśmy, będziemy! Było użyte we inkszym kontekście, ale łoddowo dzisiejszo prowda. Wielu to wzruszyń powoduje u suchaczy radiowych, tu w kraju i za granicami, jak słyszom swoj język dzieciństwa. Świycki we łożach jym stowajom, a serca sie grzejom melodiom tego języka, we wtorym jym Łojcowie piyrsze nauki życiowe dowali.

Na Śląsku łód lot godka śląsko i poprawny język polski żyły we zgodny symbiozie. Na placu sie godało po śląsku, ale rzykanie i śpiywanie kościelne sie łodbywało we poprawnym języku polskim, ze wtorego sie wywodzom łobie godki. Tak może i mo być dali, po wsze wieki! Przeca polskom i śląskom spuściznom som słowa ojca literatury, Mikołaja Reja, wtore tu trocha sparafrazują i powiym: „A niechaj narodowie, wždy postronni znajom, iż Ślązacy nie gęsi, iż swój język mają”. A znane słowa poezji Jana z Czarnolasu (tyz trocha przeprawione): „Wdarłem się na skałę dumnej Kaliopy, gdzie dotychczas nie było śladu śląskiej stopy”. Godka śląsko niny nadowo sie do używano we urzędowych sprawach wszelki maści, ale może być na swoim miejscu w codziynnym używaniu, we literaturze, we śpiywkach i widowiskach regionalnych.

Stowając tu dziś przed aeropagym polskich uconych, prosza i apeluja, zrobcie, coby tak sie stało.

Zdarzyło mi sie – nychcący – napisać i wydać taki tomik humoresek we godce śląski i jest łon przijmuwany bez czytelnikow bardzo serdecznie. Jest chyba przikładym pożytku ze śląski godki, wtore mojim zdaniem – tak jak i język polski – niny jest zawarto hermetycznie, bo łotwarto jest od wiekow na inksze goszczące w ni języki, jak na tyn przikład niemiecki. Potwierdzo to jedyn z naszych nojwiększych poetow – Julian Tuwim, kej inacy niny mog wytuplikuwać kliyjntowi, iż „...skuli kajli na iberlaufie trychter rzeczywiście boł robiony na szoner, nie zaś krajcowany, i bez holajzy w żaden sposób niny do sie zakrypować lochbajtła w celu udychtowania štendra, aby roztrajbować ferszłus, wtory dlatego źle działa, że droselklapa jest tandetnie zablindowano i teraz ryksztosuje...”

Roztomili, mający wpływ na kształt godki śląski, zrobcie tak, coby nom po latach niny ryksztosowało w śląskich sercach!

Inż. górnik Jerzy Komor – od 1996 autor audycji radiowej *Jak Ślązok z Ślązokym* nadawanej w Radiu Piekary, autor książki *Jorgusiowy szpas, czyli humoreski śląskie*, zawierającej anegdoty, humorystyczne rysunki oraz wiele śląskich powiedzeń.